

# TADAU-MINGGU' KODUVO NGOOPOD OM ONOM ID TIMPU' TOOMOD, TOUN B

29 - 9 - 2024

---

## II SPIRITU DI KINOINGAN ID DI POMOGUNAN

*Mangazou tokou do Kinoingan montok saviavi' dii profeta Dau':  
kusai om tondu ngaavi' do potitikid tinau' om kotumbazaan ii  
nakapagaha' do kalaatan om pinopointahang dii Spiritu id  
pogiigizon ngaavi' dioho'*

### HOZOU KOSUANGAN

*Dn.3:31.29.30.43.42*

Saviavi' ii noimaan Nu doid dagai, Oi Tuhan,  
noimaan Nu miampai kopombisalaan totopot,  
tu' nokopomidouso zikoi gumaga' Diau  
om au' minimozo' do ponuu' ngaavi' Nu.  
Nga' panaak no do kobontugan doid ngaan Nu  
om toguvango' zikoi no tumanud doid dii kosimaan  
do kosianan Nu.

### SAMBAYANG-TONIIBO-KOPONIMPUUNAN

Oi Kinoingan, ii popointahang do kuasa' Nu tavakas-  
koso poinsoibau do saviavi' maza' do popohiong om  
popokito do kosianan Nu, povonodo', sumambayang  
zikoi, o grasia tosima' Nu doid dagai om dodizo' no ii  
sontob umagab maganu do batos ngaavi' Nu do

tumungkus ngaavi' doid dii kotos-tangapagon-hoogo do surga. Maza' di Tuhan za Jesus Kristus, Tanak Nu, ii mamaamasi om momolinta' miampai Diau id dii kopiisaan di Spiritu Tobitua, Kinoingan, montok sohihinaid aiso kopupuson.

S. Amen.

## **PAMBASAAN KOISO'**

**Pambasaan mantad dii buuk do Kopoguntaban ngaavi' (Numbers) 11:25-29**

Suminondot i Tuhan do id Gavun. Minonongkiboos Isido di Moses, nga' minaganu tokuudi' dii sunduvan ii id disido om posuango' no ii do id dii tuu' ngoopod moomohoingon. Ontok minikot ii sunduvan do id dioho' minogoohungung izioho', nga' au' nodii vagu'.

Duvo kusai tuminindooi doiho' id husap; songuhun pungaanan do i Eldad om ii tiso' i Medad. Ii sunduvan suminondot doid dioho'; sundung i' ma do au' izioho' nokougad doiho' id Husap, nga' ngaan ngaavi' dioho' nopo nga' nokosuat poingamung dii suvai ngaavi'. Tuminimpun izioho' do mogoohungung do doiho' id husap. Ii tanak vagu minanangkus do poposunud diti doid di Moses, 'Bio', ka disido do minoboos 'i Eldad om i Medad maso mogoohungung do doiho' id dii husap.' Dadi' minoboos i Joshua ii tanak kusai di Nun, ii nokosuupu di Moses do mantad dii omuhok po isido, 'Oi Tuan ku Moses, potoodo' izioho'!' Suminimba i Moses disido, 'Apapahadan ko naku sabap dogo'?

Nung profeta ngaavi' podaa ii saviavi' tuhun di Tuhan, om pinataak di Tuhan ii Spiritu Dau' doid dioho' saviavi'!

Ii boos di Tuhan.

**S.** Kotohuadan doid di Kinoingan.

## **HOZOU KOSIMBAAN**

(HOZOU-KAPAAZAAN KO-18:8.10.12-14 R.V.9)

**S. Ii kootulan ngaavi' di Tuhan popounsikou do ginavo.**

1. Poinggonop-kozo ii undang-undang di Tuhan, mononduhi' ii di koduuduvo.

Ii kootulan di Tuhan nopo nga' maan hansano', manaak ii do kabaahan doid di tongosiibo-kogiiginovoo'. **(S)**

2. Koonokan doid di Tuhan nopo nga' obitua, kataan selajul.

Ii kootulan ngaavi' di Tuhan nopo nga' katapatan om saviavi' ii do otuhid. **(S)**

3. Ingkaa no do id dioho' o-ium di suupu Nu o koponontudukan;

tingadan tagazo ii id piopi-opi' dioho'.

Nga' isai kaanu mongiho do saviavi' hasa' disido?

Mantad kahasaan ngaavi' poinhosok pagabaso' zou.

**(S)**

4. Mantad kopimpaapandazan pagabaso' i suupu Nu om kada' potumbazaai ii do monguasa' dogo'.  
Dadi' aiso nodii mai' hasa' ku,  
ohidang mantad douso tagazo. (S)

## **PAMBASAAN KODUVO**

### **Pambasaan mantad dii suat di Sangti James 5:1-6**

Ii simba montok dii puavang. Timpuun do miad, miad montok dii koundasaan ngaavi' ii mikot doid diozu. Pinuavangan diozu saviavi' mimang buntung, basaan ngaavi' diozu saviavi' akanon do kulibombob ngaavi'. Saviavi' amas diozu om piok diozu do mimang upou, om ii-om-ii kinoupaan dii o dumadi mai' do ukum diozu sondii', om momuinakan doid tinan diozu. Tapui monutud ii tinimung diozu sabaagi do kotos-tangapagon diozu do montok dii tadau ngaavi' touvi no. Pakakalaja-ngaavi-do-kalaja'-tangavagat o minamaladu dii anau ngaavi' diozu, om tinipuan diozu izioho' – pokinongou no doid dii gaji ngaavi' ii tinimpon diozu, do humaad; ihoo' no do ii haad ngaavi' dii mongongomot ngaavi nokodimpot no doid dii tohingo ngaavi' dii Tuhan do vinangun ngaavi'. Do id tana' nopo nga' kiva'a no do diozu do kopoloson do koinsasamadan om kaganapan-tongogingo; id dii timpu' do kapagkaatan tuminihombus kou do mangaangakan gisom id kasantaban do ginavo diozu. Iziozu no ii minongukum dii taiso-hasa' om minamatai dioho'; au' i' guminaga' izioho' diozu.

Ii boos di Tuhan.

**S. Kotohuadan doid di Kinoingan.**

## **KAPAABALAN DII ABAL-TAVASI'**

*Cf. Jn 17:17*

Alleluia, alleluia!

Boos Nu nopo nga' katapatan, Oi Tuhan,  
bituaho' zikoi no id dii katapatan.

Alleluia!

## **ABAL-TAVASI'**

**Pambasaan mantad dii Abal-tavasi' tobitua sinuat  
di Mark 9:38-43.45.47-48**

Minoboos i John doid di Jesus, 'Oi Mongingia',  
nokokito zikoi do songuhun ii okonko' songuhun  
dotokou do pinapahabus do logon ngaavi' id ngaan Nu;  
om sabap do okonko' songuhun dotokou isido do  
kumininam zikoi do popotood disido.' Nga' minoboos  
i Jesus, 'Mositi' do kada' kou popotood disido: aiso i'  
songuuhun ii kumalaja' do kosunduvan id ngaan Ku do  
miaga koi' moboos do alat kokomoi Dogo'. Isai-noopo  
ii au' humavan dotokou nga' montok dotokou.'

`Nung isai-noopo o manaak diozu do sansasavan o  
vaig do inumon tu' sabap noopo do pionsanganu kou  
doid di Kristus, dadi' popoiho Zou diozu totootopot,  
pointantu-kozo no mai' do au' atagakan isido do  
tingadan dau'.

`Nga' isai-noopo ii kaantob do mogovit minsiibo' do  
songuhun dii toniini' ngaavi' ii kivaat kotumbazaan,

moomogot no do pataamon doid dii daat miampai do iso' vatu-tagazo-do-guguzangan o poingivis do hiou dau'. Om nung hongon diozu ii puun diozu do momidouso, pudungan ii; moomogot no montok diozu do sumuang doid koposizon do poinsikoi, ko' kivaa duvo hongon om mugad doid nalaka', doid dii tapui ii au' aanu momisok. Om nung gakod diozu o puun diozu do momidouso; pudungan ii; moomogot no montok diozu do sumuang doid koposizon do poingkimpo', ko' kivaa duvo gakod om pataamon doid nalaka'. Om nung mato diozu o puun diozu do momidouso, konduhon ii papahabus; moomogot no montok diozu do sumuang doid dii pomolintaan di Kinoingan do miampai iso' mato, ko' kivaa duvo mato om pataamon doid nalaka' ii id nombo ii gizuk dioho' do au' matai om ii tapui dioho' au' mimang pisok.

Ii Abal-tavasi' di Tuhan.

S. Kaazaan doid Diau, oi Tuhan za, Jesus Kristus.

*Booson ii Otumbazaan zou.*

## **SAMBAYANG DO ID DII TITAAK NGAAVI'**

Panaak no dagai, Oi Kinoingan tobinsianan, do iti titaak dagai ko'ium nodaa do konoimaan miampai Diau om maza' diti ii toobong-hokos do saviavi' balakat oivangan nodaa id dumbangan za. Maza' di Kristus Tuhan za.

S. Amen.

## **PREFACE KO-II DII TADAU-MINGGU' NGAAVI' ID TIMPU' TOOMOD**

Ii Mistirium do kopomosizan

Totoopot do kotunud om otuhid iti, kalaja' za om kopomasizan za, tomoimo om id-nombo-noopo do manaak Diau do koponongkotohuadan ngaavi', oi Tuhan, Tama' tobitua, Kinoingan tavakas-kozo om aiso-kopupuson, maza' di Kristus Tuhan za.

Tu' mantad kosianan montok do ginaga' dagai, pinohuduk Disido o Dau-sondii' om nopogkoosusu dii Haahangai; maza' dii kinadaa'an doid dii salip pinagabas zikoi Disido mantad kapatazon au-miho-opupusan, om maza' do tuminungag mantad dii poimpatai minanaak Isido dagai do kopolosizon aiso-kopupuson.

Om ingkaa no, miampai Tasab ngaavi' om Huguan-ngaavi-tasab, miampai Tiikoon-laja' ngaavi' om Pomolintaan ngaavi', om miampai saviavi' dii mogiigizon-ngaavi-id-surga om Kuasa' ngaavi' do surga, humozou zikoi dii hozou kapaasaan do kobontugan Nu, om miampai-aiso-kopupuson mangazou zikoi:

***Obitua, Obitua, Obitua.....***

## **HOZOU KOSOMBUTAN**

*Cf. Ps 118:49-50*

Ondomo' ii boos Nu doid di suupu Nu, Oi Tuhan, ii toombo do nakapanaak ko dogo' do kahansanan. Iti no ii koinsasamadan ku ontok oovit zou sumiibohumuduk.

*toi'*

*1 Jn 3:16*

Maza' diti no do nokoikot zikoi do mongiho dii koginavaan di Kinoingan: do i Kristus pinopoundun do kopouloson Dau' montok dagai; ingkaa no do apatut zikoi do popoundun do kopouloson ngaavi' dagai montok tiso-om-tiso'.

## **SAMBAYANG OPONGO KOSOMBUTAN**

Iti mistirium pounsurga, Oi Tuhan, popotonduhi' nodaa dagai id pomumusoou om tinan, do sompi-tumungkus zikoi nodaa id kobontugan miampai di Kristus, doid diisai do koundasaan do osompuu zikoi soosongian-noopo do papaabal zikoi dii Kinapatazon Dau'. Ii mamaamasi om momolinta' montok sohihinaid aiso kopupuson.

**S. Amen.**

## **BALAKAT**

Ii balakat di Kinoingan tavakas-kozo, i Tama', om i Tanak, ✠ om i Spiritu Tobitua, sumondot nodaa do id diozu om tumimpoon miampai diozu sohihinaid.

**S. Amen.**